

COLOSSAE MITE HENGA PAUL LEKHA THOT

Ipi pentah ingaichat be diu ham?

Paul in Christa imajouse ahidan, Tahsan cha alungboi ho agelddohsah

Colossae lekhabu sung thu umdan

Paul jal'in Christa loupina le thuneina chu Colossae Houbung honlhom cha chunga aki-lah'in ahi. Jesu—Koiham, athilbol itilam dol'a ama banga hin ding ham, kiti hi thupi ahi. Solchah Paul chun Pathen thil jouse boltheipa chung chang thua paolah'a alupen chu amangin ahi.

Lekhathot jihpa chule ajih kum

Solchah Paul in AD 60-62 sunga ajih ahi. Rome lengvaipo akon songkul atanlaiya ajih ahi.

Ipi denga ajih ham?

Paul solchahpa Epaphras chun Colossae mun'a Houbung anaphutdoh in ahi. Houdan kibang lou chom chom umna mun ahin, hiche holah achun Pathen in adih chu aphondohsah in ahi. Hiti chun Solchah Paul in Ngailut umtah Colossae mite henga ahoulim in ahi.

Salam Thu

¹ Hiche lekhathot hi Pathen in alunglama alhendoh Christa Jesu solchah Paul le i-sopiu Timothy a kon ahi. ² Pathen mithengte Colossae

khopia um, Christa a tahsan umtah sopiho henga dinga kahin jih'u ahi. I Pau Pathen chun lungset le cham-lungmon napeuhen.

Colossae tahsan ho dinga paul atao

³ Keiho nangho dingin katao jingun chule i-Pakaiyu Jesu Christa Pa Pathen chu kathangvah jingun ahi. ⁴ Kipana Thupha thutah nanajah pat-niua pat nangho dinga kinepna vana kikoipeh nahi tauve. ⁵ Ajeh chu keihon Christa Jesua natahsanu chule Pathen mite jouse nangailut u thudol kanaja tauve. ⁶ Hiche Kipana Thupha nahenguva hung chu vannoi muntin a kisol a ahitai. Pathen milungsetna kidangtah thu najahpat uva chule thutah thu chu nahet chet niuva pat a nahinkhou akikhel banga gasoa hinkhoho akikhelsah ahi. ⁷ I-sopiu deitah katohkhompiu Epaphras a kon in jong Kipana Thupha nanahe tauve. Amahi Christa lhacha tahsan umtah le nangho thalhenga eikithopiuba pangah ahi. ☩ ⁸ Amahin Lhagao Thengin napeh u ngailutna naneiyu thu eiseipeh u ahi. ⁹ Nangho thu kajah niuvapat nangho dinga tao jinga kahiuve: hichu Alunglam nahet bulhingset uva chule Lhagaolama chihna le hetthemna napehna dinguva tao kahiuve. ¹⁰ Hichea chu nahinkho mandan u Pakai jabolna le lunglhaina ahijinga, chule nahinkhou chun gapha asodohna dinga, chule Pathen hetna a nakhantou becheh cheh theina dingu hi ahiye. ¹¹ Kataonau jong hi, nangho Athaneina loupi jal a nangho thahatsah a thohhatle lungdehat nangaichat dungjui uva

◊ ^{1:7} Col 4:12; Phile 1:23

napeh uva kipana a nadim letsetna dingu ahi.
12 Vah'a cheng Amithengte chuto goulo ding
 Apeh chu changkhom dinga eisemuva Pachu
 thangvah jingun. **13** Ajeh chu Amahin muthim
 lenggama kona eihuhdoh uva chule Alungset
 Chapa Lenggam mia eisemu ahitai. **14** Athisana
 chamlhatna eichohdoh peh uva, ichonsetnau
 jengjong angaidam ahitai. ☩

Pathen pilhinna

15 Christa chu mutheilou Pathen chu muthei
 limpua hung ahi. Ama thil kisem masangpeh a
 ana umsa chule thilsem jouse chunga thunei vai-
 homa ahi. **16** Ajeh chu Ama jal a Pathen in ijakai
 vana hihen chule leichunga umho hijongleh,
 imutheiyu le imutheilouv u hijongleh anasem
 ahi-laltouna ho, lenggamho, vaipoh naho, chule
 thuneinaho akimuphalou vannoi pumpia um,
 aboncha Ama jal le Ama dinga kisema ahi.
17 Ama imacha um masangpeh a anaumjingsa
 ahin, chule Aman thilsem jouse akhut a atuh ahi.
18 Christa hi houbung luchang (hichu Ama tipum)
 ahi. Ama abul kipatna, thinaa kon a thoudoh
 jouse chunga thuneipa ahijeh a, ima jousea
 masapen ahi. ☩ **19** Ajeh chu hichu Pa lunglam
 ahi. **20** Chule Christa a hi Pathen hina bulhingset
 um thingpel chunga Christa thisan kiso chun
 kichamna asem a; van'a umho hihen chuleh
 leiya umho hijongleh Pathen in ijakai Ama a
 dinga chamna chu asem ahitai. ☩ **21** Hichehin,
 masanga nangho Pathen a kona gamlatah a
 naum uva, nalunggel u phaloule chonna phatlou

✩ **1:14** Eph 1:7 ✩ **1:18** Eph 1:22,23 ✩ **1:20** Eph 2:16

jeh a amelmate nanahiu ahiye. ²² Chuti jongleh, tua hi Christa hin atahsa tah a thina ato ahitah jeh in, Amatah in kichamna chu asem ahitai. Hiche hin, themmona neokhat jong neitalouva athenga le nolna beiya Ama angsunga nadinsah u ahitai. ²³ Hijongleh nanghon hiche thutah hi natahsan jomuva chule nadin detjom dingu ahi. Kipana Thupha nanajah uva nakisan u photchetna a kon chun kiheimang gohihbeh un. Hiche Kipana Thuphahi vannozi leiset munjousea kihillhang ahitai, chule keima Paul hi Pathen lhacha hina a seiphong dinga eikingansea ahitai.

Houbung dinga Paul nato

²⁴ Katahsatah a nangho dinga kagimthoh hi kakipah-e, ajeh chu keiman Christa hesoh thohna'a atipum, hichu Houbung, kathoh khompi ahi ti kahet ahi. ²⁵ Pathen in Ahoubung lhacha kinbol dinga eingansea Athupoh chu poa nangho henga phongdoh dinga hunga kahi. ²⁶ Hiche thupoh hi kum aja ja a chule akhang khanga aguh a kikoi chu, tua hi Pathen mite henga kilangdoh a ahitai. ²⁷ Ajeh chu Pathen in Christa a ahaona le aloupina chu chidang namdang nangho jong nahetsah nom hin Aloupina nachantha nomu ahi ti aphotchetna ahi. ²⁸ Hijeh a hi keihon midang Christa thu kaseipeh uva, amitakip Pathen in chihna eipeh jouseu mangcha a hilchah le thuhilna kaneiyu hi, amitakip Christa to akiguijopnau chamkimsahna dinga ahi. ²⁹ Hijeh a hi keima tonggima kiseh tah a kapan a, kasunga Christian thahattah'a anatoh a chu kingam'a kahi.

2

¹ Keiman nangho le Laodicea a um houbungho chule tahsaa kakimupi loulaiho chengse dinga nasatah a kapohnat peh uhi nahet dingu kalung-got ahi. ² Keiman amahohi alunguva lhamonna aumtheina dinga amahohi tilkhouva chule ngailutnaa akikandet uva, hitia hi amahon Pathen lunggon thuguh Christa Amatah a um chu ahedtloh theina dingu kangaito ahi. ³ Ama a chu chihna le hetna gou aboncha kisela ahi. ⁴ Hiche kaseipeh uhi koimachan doha pana nangho mothhua na lheplhah louna dingu ahi. ⁵ Ajeh chu keiman tahsa a nalath uva kaumlou vang'in, lhagaovin kaumpiuve. Chule keiman nachondih ule Christaa natahsan det u thu chu kipahtah in kave jinge. ⁶ Chule tun, nanghon Christa Jesu chu Pakaiya nakisan bangu chun, Ama chu juijomun. ⁷ Nakihilsa banguvin, Ama a jungkho uvvin lang, thutah'a chun kisahdoh un, chule thangvahna dimletset in hinguvin.

Christian hinkho chamkimna

⁸ Mihem lunggel leh hiche vannoi lhagao thuneihoa hungkon chihgut lekhathemna le doha lheplhah a na-umlouna dingun chingth-eiyun, hichu Christa a kon ahipoi. ⁹ Ajeh chu Christa mihem tahsaa chu Pathen hina bulhingset a chenga ahi. ¹⁰ Chule nangho hichea chu kisuchamkima nahiuve, amachu piputle thuneina jouse luchang ahi. ¹¹ Nangho Christa henga nahunguva chu aman lhagaova chep natan peh-u ahitai, hinla hichu tahsaa cheptan ngai chu hitalouvin, chonna ngai chonsetnomna chu atanlhah ahibouve. ¹² Ajeh chu baptize

nachanuva chu Christa toh kivuitha nahi tauve. Chule nanghon Christa kaithoupa Pathen thahat chu natahsan jaluva Amatoh hinkho thah a kaithouva uma nahi tauve. ^{◊ 13} Nachonset nau le chonsetnom naho chu paidoh a um ahiloulai jeh a nangho athia nanahiu ahi. Pathen in ichonsetnau angaidam tahjeh a Christa to eihin khomsah u ahitai. ^{◊ 14} Aman eiho dounaa themmo chansahna bat lekhabua kijih chu akah a, chule thingpel'a akhetbeh tah jeh a alahmang ahitai. ^{◊ 15} Hiti chun aman lhagao lama vaipohole thuneaho chu athaneinau alahpeh a, thingpel'a agaljona jal'a chu amaho chu lhang-phonga maimoh-a alha ahitai.

Chunglam thil ho holjouvin

¹⁶ Hijehchun nangho naneh u ahiloule nadonu ahiloule nikho khat achoma nitloujeh ahiloule lhathah nikho nit ahilouleh choldo nikho thua koiman na-oimo dauhen. ^{◊ 17} Ajeh iham itileh cheho chu atahbeh hunghung ding vetsahna ho ahibouvin, hinla Christa chu atahbeh a hung hitai. ¹⁸ Koima kineosah lhema le vantil ho houna thua kipui mangsah hih un. Hitobang mi chu athilmu u thudol akip acoiyin aseiyun, amaho chun lhagao lam lunggel aneipouvin, tahnasaa thaset lunggelin ahoithosah uvin, ¹⁹ Amaho chu aluchang Christa to kijopmatlou ahiuve. Ajeh chu Aman tipumpia agu kisuhtona le kikilmat tona chu akhut a aloikhoma Pathen in akhansah dungjuiya aumsah ahi. ^{◊ 20} Nangho Christa to thithaa nahitah uleh, hiche vannoi lhagao

[◊] **2:12** Rm 6:4 [◊] **2:13** Eph 2:1-5 [◊] **2:14** Eph 2:15 [◊] **2:16**
Rm 14:1-6 [◊] **2:19** Eph 4:16

thaneinaa kona nachamlhatsah u ahitai. Chuti ahileh ipi itia vannoiya hingnalai banga chu vannoii chonna dan kihilna,²¹ Tham hih in, tep hih in, tuh hih in kitihohajui nahlaiyu hintem?²² Hiche kipuina dan hohi mihem thupeh le thuhil ahin, ahung kimanchah toh lhon a mangthai ding thil ahibouve.²³ Hiche chonnadan kijuihohi chihtoh a ahi, hicheckoa hin eimatah lungchama hou, eima tah kingaitoma kingainemna chule tahsa kithununna angaiyin ahi. Hinla hichecko hin mikhat lung ngaichat phalou jona apechompoi.

3

Tahsalam jenga hinglouva christa'a hin

¹ Nangho Christa toh hingkhoma nahiuleh, Pathen jetlam'a touva Christa umna chunglam chu veuvin. ² Nanghon leiset thilho hijolouvin, chunglam thilho geljouvin. ³ Ajeh chu nangho hiche hinkhoa dia athia nahi tauvin, nahinnau atahbeh chu Pathen a Christa toh kisela ahi. ⁴ I-hinnau Christa ahung kilah phatteng nangho jong Amatoh loupia kilangkhom ding nahiuve.

Hinkholui chule hinkho thah

⁵ Hiti ahijeh chun, leiset chunga natibah chengu: jon lungput, thenlouna, huh lungput, lungdihlou ken, chule kiloset hicheckohi milim houna ahin, abonchan thisah sohkeiyun. ⁶ Hiche chonsetna ho jeh hin thua nunglouho chungah Pathen lunghanna chun alhun khumjin ahi. ⁷ Hichecko hi vannoiya dinga nanahinlai uva chu

[◊] 3:1 Labu 110:1

anaboljia nahiuve. ⁸ Hinlah tuhin: lunghan, lungsat miduhabol, Pathen taitom, thuthanghoi seina kam, hichengho hi pailhauvin. ⁹ Khatle khat jounvin kiheh hih un, ajeh chu nanghon milui hinkho le anatoh chu napaiyu ahitai. ^{*} ¹⁰ Nanghon nasempau nahet nau lungthim chu panun chule mithah chu kivonun chule Ama tobang hiuvin. ^{*} ¹¹ Hiche hinkhoothah a hin hi Juda mi nahiha, chidang namdang nahim? Cheptanmi nahiha, cheptanlou nahim? Lekha helou akhangtou loulai soh chu nahiha, ongthol nahim? Christa chu eih dinga ima jousea iningl-hinnau ahitai. ¹² Hiche jeh chun Pathen lhen-chom mithengte deiumtah angailut namthenga lhendoh nahitah jeh uvin-mikhotona lunggel, mihepi, kineosah, nunnenma lungthim, thohhatna in kivonun. ^{*} ¹³ Khatle khat kidemdaito cheh un, kingaidam ton a neiyun, akina khattou auma ahijongleh Christa chun nangaidam banguvin nanghon jong ngaidam'un. ^{*} ¹⁴ Hicheng jouse chunga hin ngailutna chu kivonun, hichu kikankhomna phachamkim pen ahi. ¹⁵ Chule Pathena cham lungmon chu nalunguva vahom-sah un, hichea dinga chu nangho jong tipum khat'a chamlen dinga kou nahiuvin chule thang-vah jingun. ¹⁶ Christa thu chu chihna jouse tothon nasung uva cheng dimset hen; khat le khat tumgingtoh tholan houlan, chule lhagaolan kihilun chule kitilkhou touvin, nalung gil un Pakai choi-atnan lasauvin. ^{*} ¹⁷ Chule thua hihen,

^{*} **3:9** Eph 4:22 ^{*} **3:10** Eph 4:24; Semtilbu 1:26 ^{*} **3:12** Eph 4:2 ^{*} **3:13** Eph 4:32 ^{*} **3:16** Eph 5:19,20

natoh a hita jongleh, nabol jouseu chu Pakai Jesu minin bolun lang, Ama jal'in Pa le Pathen chu thangvah un.

Hinkho thah ahijeh'a ule nao kinbol ding

¹⁸ Ji numeihoh, Pakai mitmua dih ahina jal in najipa teu thunoiya kipelut un. ¹⁹ Pateho, na-jinu teu ngailu uvin chule amaho chunga lunghimona neiih un. ²⁰ Chateho, imalam jousea nanule napateu sei thun nungun, hichu Pakai lunglhainapen ahi. ²¹ Pateho, nachateu chu sulungphamo hih un, lunglhahnan neiget uvinte. ²² Sohteho, tahsalam hina dungjuiyin napakai teu seithua nungun, mihem lunglhaisahna a mitmu soh hilouvin, Pathen ging hinan lungdih-pun umun. ²³ Chule ipi hileh nabol'u chu Pakaiya lunggilin bolun, mitmu soh hilouvin Pakai jal abol hiuvuin. ²⁴ Pakaiya goulo ding tohman nachan dingu ahi chu heuvuin: ajeh chu nangho Pakai Christa kinbol nahiu ahi. ²⁵ Ahin thilse bola chu nahileh nathilse bol chu naikimu ding ahi. Hichea hin maipha vetna aumpoi. ^{*}

4

¹ Pipua pang ho nanghon jong vana APipu khat naneiyu geldoh uvin lang nalhachahou chunga adih le ahoi bol hiuvuin. ² Nangho taonaa ponpan tothon lunglimgeh in umun, chule thangvahna lunggel neijun. ³ Pathen in kei-hoa Christa a athuguh alunggon chu aphondoh

^{*} **3:18** Eph 5:22; 1 Pet 3:1 ^{*} **3:19** Eph 5:25; 1 Pet 3:7 ^{*} **3:20** Eph 6:1 ^{*} **3:21** Eph 6:4 ^{*} **3:22** Eph 6:5-8 ^{*} **3:25** Danbu Ni Na 10:17; Eph 6:9 ^{*} **4:1** Eph 6:9

theina dingin, keiho dingin taovun. Hiche jeh a hi keima thihkhauva eikihen ah ahi. ⁴ Keiman hiche thupeh hi kicheh tah a kaseiphong theina dingin neitao peh un. ⁵ Tahsan neilouho lah a chun chingtheitah in hinkho mangun, chule phat kijenpet chu phatchom pi penun. ⁶ Nanghon amitakip dinga donbutna dihtah nanei theina dingun, na kihoulim nau chu lungsetna thucheng le lahthei ding cheh hihen.

Achaina tepna phabep

⁷ ⁸Pakaiya sopi deitah, lhacha natohna a tahan umtah chule lhachana katohkhompi Tychicus hin kaumchan thudol abonchan nangho hin-seipeh nauvinte. ⁹ ¹⁰Keiman amaa kona nachung changthu u chu kahetchentheina dinga chule amahin nalungu amonsah theina dingin nahenguva kahinsoltai. ¹¹ Chule amatoh kilhondin amin Onesimus, nalahuva tahsan umtah le sopi deitah toh'in nang ho heng lama kahinsol thauve. Amani hin hikoma nakitong thudol ijakai hetsah lhon nauvinate. ¹² Songkul kalut chankhompi Aristarchus in salam napeuve, chule Barnabas sopinu chapa Mark in jong salam napeuve (Mark hi nahenguva ahunga ahileh anasangan tia achungchang thua thupeh namusau ahitai). ¹³ ¹⁴Chule Jesu (Justus kitipa chu) jong hin salam napeuve. Hichengho chengse bou hi cheptan holah a kona Pathen Lenggam chalsahna dinga katohkhompiho ahiuvin, amaho hi keima dinga

⁸ **4:5** Eph 5:16 ⁸ **4:7** Eph 6:21,22 ⁸ **4:7** Act 20:4; 2 Tim 4:12 ⁸ **4:9** Phile 1:10-12 ⁸ **4:10** Act 19:29; 27:2; Phile 1:24; Act 12:12,25; 13:13; 15:37-39

monpi umtah ahiuve. **12** Jesu Christa lhacha le nakiloi khompiu Epaphras in salam napeuve. Nanghon Pathen lunglam najui bukimkei uva chule nachamkimna dinguva ama nangho dinga gunchua taojing jenga ahi. ☩ **13** Ajeh chu keiman amahi-nangho dinga, Laodicea umho le Hierapolis a umho chengse dinga taonaa gunchu lheh jenga ahi, ti kahettohsah ahi. **14** Louthem deiumtah Luke le Demas teni hin salam napeuve. ☩ **15** Laodicea khopia um sopite ho le Nymphas chule a-in'a um houbung miho salam anapeuvin. **16** Chule nanghon hiche lekhathot hi nalah uva akisim jouteng, Laodicea houbung sunga jong sim theiding ngaito uvin; chule chutima chun Laodicea a lekhathot jong chu anasim teiyun. **17** Chule Archippus jah a chun, “Pakaiya kona nakisan akinbolna natohna hi chingtheiyin lang subulhit in” tihi seipeh in. ☩ **18** Hiche hi keima Paul'in kakhut a kasut salamna ahi. Nanghon thihkhaova kihen kahi geldoh un. Lungsetna in naumpiuhen. Amen

✩ **4:12** Col 1:7; Phile 1:23 ✩ **4:14** 2 Tim 4:11; Phile 1:24; 2 Tim 4:10; Phile 1:24 ✩ **4:17** Phile 1:2

**PATHEN LEKHABU THENG
The Holy Bible in the Chongthu Dialect of India**

Copyright © 2020 Chongthu Bible Translation Team

Language: Chongthu (Chin, Thado)

Dialect: Chongthu

This is a draft copy of a work in progress. It will be updated.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2022-11-09

PDF generated using Haiola and XeLaTeX on 11 Nov 2022 from source files dated 9 Nov 2022

3254801d-c34e-5c2b-be2e-99bf486ad253